

# Malaysia perlu generasi muda berpelajaran — PM



MW 17 NOV 1988

TELUK INTAN 26 Nov. — Perdana Menteri, Datuk Sri Dr. Mahatir Mohamad berkata, Malaysia memerlukan generasi muda yang berpelajaran, berpengalaman luas dan dinamik.

Katanya, ibu bapa dan para guru di semua peringkat adalah kumpulan utama dalam membentuk generasi akan datang menjadi satu generasi yang dapat memperjuangkan masa depan masyarakat dan negara.

Justeru itu, beliau berharap para guru akan dapat meningkatkan sumbangan ke arah membentuk satu generasi yang bakal mewarisi negara yang terus melangkah ke arah kemajuan.

"Saya berharap para guru akan dapat menebalkan lagi tekad dalam

membentuk satu generasi yang kita cita-citakan itu tegasnya dalam perutusan di buku cenderamata Persatuan Guru-Guru Melayu Malaysia Barat (KGMMB) sempena sidang perwakilan tahunannya pada 3 dan 4 Disember ini di Pulau Pinang.

Perdana Menteri akan berucap merasmikan mesyuarat agung KGMMB dan Koperasi KGMMB di Dewan Tuanku Syed Putra Universiti Sains Malaysia Pulau Pinang pada 3 Disember ini mulai jam 9 pagi.

Seramai 2,000 orang ahli KGMMB dari 15 cawangannya seluruh tanahair akan menyertai persidangan tersebut yang akan dihadiri sama oleh Menteri Pendidikan, Encik Anwar Ibrahim dan Ketua Menteri Pulau Pinang, Dr. Lim Chong Eu.

## Wajah

Sementara itu, Encik Anwar Ibrahim dalam perutusannya menyifatkan KGMMB sebagai sebuah kesatuan guru terbesar di negara ini yang merupakan kesinambungan wajah perjuangan guru-guru Melayu yang telah dimulakan sejak Kesatuan Persekutuan Guru-Guru Melayu Semenanjung (KKPGMS) yang ditubuhkan dalam tahun 1946.

Katanya, dalam tempoh yang begitu panjang menggambarkan betapa banyak dan besarnya jasa dan bakti yang telah ditaburkan oleh guru-guru Melayu melalui KPGMS dan kemudiannya KGMMB merangku-mi berbagai bidang politik, sosial ekonomi, pendidikan dan pembelaan nasib guru-guru Melayu seluruhnya.

Menteri Pendidikan menaruh keyakinan terhadap masa depan KGMMB yang akan terus memainkan peranan yang positif di tengah-tengah pergolakan dan perubahan masyarakat yang bertambah maju dan mencabar di negara ini.